

普賢行願品補充講義

般若三藏法師

北印度迦畢試國（屬賓）人，姓喬達摩。七歲出家，投大德調伏軍之門，誦四阿含及阿毗達磨。十四歲隨師入迦濕彌羅，誦習研究有部律、《俱舍》及《婆沙》，前後達七年。二十歲受具足戒。二十三歲至中印度那爛陀寺，依智護、進友、智友等三大論師研習唯識、瑜伽、中邊、金剛經、五明等。後游雙林八塔，往來瞻禮十八年；尋至南天竺烏荼王寺，師事法稱學瑜伽教，並登灌頂壇諮受五部真言。

後乘船遍游南海諸國，于唐德宗建中二年（781）抵達廣州，翌年至長安。貞元四年（788）與大秦寺波斯僧景淨譯成譯出《大乘理趣六波羅蜜多經》十卷，翌年又譯出該經中之真言、印契、法門等。然師不諳胡語，不解唐言，景淨亦不通梵文、釋教，因此新出經典未得流行之允許。後受命與利言等九人，於西明寺重譯該經。四年六月創經題，十一月將一部十卷繕寫奉進。五年二月譯《大華嚴長者問佛那羅延力經》。

六年七月帝賜“般若三藏”名及紫袈裟，時年五十七。後又依沙門智柔之請譯《般若心經》一卷，但未及參詳即奉敕出使迦濕彌羅國。八年四月返抵長安。十年巡禮五臺山。十二年六月奉命於崇福寺宣譯《華嚴經》（早先由烏荼國進貢者）。十四年二月完成，得四十卷，即所謂《四十華嚴經》。另譯有《守護國界主陀羅尼經》十卷及《大乘本生心地觀經》八卷。後寂於洛陽，遺骸葬于龍門西岡，年壽不詳。

菩提心

佛道無上誓願成

法門無量誓願學

煩惱無盡誓願斷

眾生無邊誓願度

一者禮敬諸佛

二者稱讚如來

三者廣修供養

四者懺悔業障

五者隨喜功德

六者請轉法輪

七者請佛住世

八者常隨佛學

九者恒順眾生

十者普皆回向

福德資糧

智慧資糧

往生極樂

圓成佛道

禮敬諸佛

○若有眾生禮佛塔廟，得十種功德《佛說業報差別經》

一者得妙色好聲

二者有所發言，人皆信伏

三者處眾無畏

四者天人愛護

五者具足威勢

六者威勢眾生皆來親附

七者常得親近諸佛菩薩

八者具大福報

九者命終生天

十者速證涅槃

○十種禮法《華嚴經疏鈔》

一、我慢禮：如碓上下，無恭敬心

二、唱和禮：高聲喧雜，辭句渾亂

三、恭敬禮：五輪著地，捧足殷重

四、無相禮：深入法性，離能所相

五、起用禮：雖無能所，普運身心，如影普徧，禮不可禮




六、內觀禮：但禮身內法身真佛，不向外求

七、實相禮：若內若外，同一實相

八、大悲禮：隨一一禮，普代眾生

九、總攝禮：攝前六門，以為一觀

十、無盡禮：入帝網境，若佛若禮，重重無盡



禮拜三寶文

我弟子○○仰仗普賢行願威神之力，願以一身，一身復現刹

塵身，一爲無量，普現十方世界一切

諸尊佛
賢聖僧

前，一一身復現刹

塵身，普徧代替十方法界六道群靈，一切天人阿修羅地獄餓鬼

畜生，以及代替弟子○○歷劫以來，乃至今生的父母師長知識

檀越法俗眷屬冤親債主，一心頂禮盡虛空徧法界，微塵刹土

中，十方三世一切

諸尊佛
賢聖僧

○拜下去時，念偈云：

「普賢行願威神力，普現一切

佛寶
僧寶
法寶前；

一身復現刹塵身，一一徧禮刹塵佛僧法。」

○頭點地時，念偈云：

「我昔所造諸惡業，皆由無始貪瞋癡；

從身語意之所生，一切我今皆懺悔。」

「惟願十方

佛寶
僧寶
法寶

，慈悲攝受；

放淨光明，照觸我身；

諸罪消滅，三障蠲除；

復本心源，究竟清淨。」

（觀想三寶放大光明，照我身心）

○起身之時，念偈云：

「罪從心起將心懺，心若滅時罪亦亡；

心滅罪亡兩俱空，是則名爲真懺悔。」

禮拜佛菩薩文

我弟子○○仰仗普賢行願威神之力，願此一身，一身復現刹塵身，一爲無量，普現十方世界一切○○○○如來前，一一身復現刹塵身，普徧代替十方法界六道群靈，一切天人阿修羅地獄餓鬼畜生，以及代替弟子○○歷劫以來，乃至今生的父母師長知識檀越法俗眷屬冤親債主，一心頂禮現前及十方世界的○○○○如來的○○○○菩薩。

○拜下去時，念偈云：

「普賢行願威神力，普現一切○○○○如來前；
一身復現刹塵身，一一徧禮○○○○如來。」

○頭點地時，念偈云：

「我昔所造諸惡業，皆由無始貪瞋癡；
從身語意之所生，一切我今皆懺悔。」

「惟願○○○○如來，慈悲攝受；
○○○○菩薩

放淨光明，照觸我身；

諸罪消滅，三障蠲除；

復本心源，究竟清淨。」

（觀想佛菩薩放大光明，照我身心）

○起身之時，念偈云：

「罪從心起將心懺，心若滅時罪亦亡；
心滅罪亡兩俱空，是則名爲真懺悔。」

《離垢慧菩薩所問禮佛法經》

大唐三藏那提譯

如是我聞：

一時，佛在室羅毘悉帝城勝德林中給孤獨園，與大比丘眾五百人俱，菩薩無央數。又與無量婆羅門、毘舍、首陀，并諸長者，各各皆是大眾之首，與其同類，來至佛所。又有天、龍、夜叉、乾闥婆、阿修羅、迦樓羅、緊那羅、摩睺羅伽，在大法會，前後圍遶。

爾時，眾中有菩薩摩訶薩，名離垢慧，即從座起，偏袒右肩，右膝著地，恭敬合掌，前白佛言：「世尊！欲有少問，願見聽許。」

佛言：「恣汝所問，當隨意答。」

離垢慧菩薩既聞佛許，踊躍無量，而白佛言：「若有善男子、善女人等，於如來所，云何恭敬、禮拜、供養？」

佛言：「離垢慧！善哉，善哉！汝多悲愍、饒益、安樂一切人天。當善諦聽，為汝解說。『若善男子及善女人，欲於佛所，起禮敬者，先應發願，作如是言：』我今至心頂禮十方諸佛，普入一切諸勝法中。我今五輪於佛作禮，為斷五道，離於五蓋，願諸眾生，常得安住，無壞五通，具足五眼。」

願我右膝著地之時，令諸眾生，得正覺道。

願我左膝著地之時，令諸眾生，於外道法不起邪見，悉得安立正覺道中。

願我右手著地之時，猶如世尊，坐金剛座，右手指地，震動現瑞，證大菩提，今我亦爾，共諸眾生，同證覺道。

願我左手著地之時，令諸外道難調伏者，以四攝法而攝取之，令入正法。

願我首頂著地之時，令諸眾生，離憍慢心，悉得成就無見頂相。』離垢慧！是為五輪作禮之相。

次禮十方現在諸佛，應作是言：

『南無東方阿閼如來。廣及彼方無量世界一切如來，諸大法藏，并諸菩薩、聲聞、緣覺一切賢聖。

』南無南方寶相如來。廣及彼方無量世界一切如來，諸大法藏，并諸菩薩、聲聞、緣覺一切賢聖。

』南無西方無量壽如來。廣及彼方無量世界一切如來，諸大法藏，并諸菩薩、聲聞、緣覺一切賢聖。

』南無北方妙鼓聲如來。廣及彼方無量世界一切如來，諸大法藏，并諸菩薩、聲聞、緣覺一切賢聖。

『南無東南方因陀羅難都幢王如來。廣及彼方無量世界一切如來，諸大法藏，并諸菩薩、聲聞、緣覺一切賢聖。』

『南無西南方寶遊步如來。廣及彼方無量世界一切如來，諸大法藏，并諸菩薩、聲聞、緣覺一切賢聖。』

『南無西北方娑羅因陀羅王如來。廣及彼方無量世界一切如來，諸大法藏，并諸菩薩、聲聞、緣覺一切賢聖。』

『南無東北方無量幢王如來。廣及彼方無量世界一切如來，諸大法藏，并諸菩薩、聲聞、緣覺一切賢聖。』

『南無上方智光如來。廣及彼方無量世界一切如來，諸大法藏，并諸菩薩、聲聞、緣覺一切賢聖。』

『南無下方毘盧遮那如來。廣及彼方無量世界一切如來，諸大法藏，并諸菩薩、聲聞、緣覺一切賢聖。』

『次又歸命娑婆世界本師釋迦牟尼如來。廣及十方無量世界一切如來，諸大法藏，及入地菩薩摩訶薩、聲聞、緣覺一切賢聖。』

又作是言：『我今一心頂禮如上一切佛、法、諸賢聖眾，當願證知我。從今日乃至菩提，常行歸依佛世尊者、大慈悲者、一切智者、一切知見者、諸畏已離者、人中大師子、大龍王、』

人中大神士、大丈夫、一切遍知，不思議身、無上身、無等身、不與二乘共身、清淨法身，一切眾中最尊上者，我今至誠，一心歸命。』如是歸命百遍、千遍、百千萬遍，乃至無量無數遍，盡未來際，徹骨徹髓，歸依如上諸佛世尊。

又作是言：『我今以身、口、意三業善根，共諸眾生，歸依於佛，常不離佛。如是歸依坐道場者、常住常恒不變者、不老不死不滅壞者、無住無緣性寂靜者、住於法舍作大護念為洲渚者、為歸為依證涅槃者、於諸法中住最上者，我今至誠，慇懃鄭重，歸命如是諸佛正法。』重又如上，至誠歸命住種性中諸菩薩等，從歡喜地乃至法雲，住於十地諸菩薩僧。

次應懺悔，當作是言：『唯願十方諸佛世尊，證知、憶念、哀受我懺。身業三種，行殺、盜、姪；口業有四，妄言、惡口、兩舌、綺語；意三業行，謂貪、瞋、癡；自作、教他、見作隨喜，如是十惡，今悉懺悔。』又重思惟：『無始已來，輪轉六道，於諸眾生，種種欺負：大斗重秤取物自資，輕秤小斗便與他物，假飾衣金潛行毒藥，皆為損害，今悉懺悔。或謗三乘，妄說法律，輕慢三寶，欺調二親，於諸尊長、和上、闍梨、耆老之前，不生祇敬。如是等過去諸罪，今悉懺悔；現在惡業，誠心發露；所未作者，更不敢作。今於諸佛，諸菩薩等最大眾首、無比無上無等等前，發露懺悔，不敢覆藏，一懺已後，更不重造。』如是懺悔，第二、第三，亦如上說。

次應勸請，當作是言：『十方諸佛，若未轉法輪，若欲入涅槃者，我皆勸請，唯願久住，

於無量劫，愍諸眾生，雨大法雨，轉正法輪，不般涅槃。」

次應隨喜，當作是言：「十方所有三乘賢聖，數如恒沙，及一切眾生，修行六度助菩提法，我皆隨喜。」

次應迴向，當作是言：「十方三世諸佛作業，及諸菩薩、聲聞、緣覺所行六度，盡已迴向無上菩提，我亦如是迴向佛道。」

次應發願：「仰惟十方三世諸佛菩薩，皆發弘願，盡虛空、遍法界所在流化為諸眾生，三界所攝無有遺餘，願令眾生利樂成熟、具善律儀、住大涅槃，今並現前。我亦如是大誓莊嚴，願我於無上道，心不散亂，常見諸佛，常聞正法，承事修行，無有空過；所作善法，及菩提心，亦不退失；所生之處，供養聖眾，教化眾生，得無上道，轉正法輪，具大神通；亦令眾生如是修學，至不退轉。」

「又願一切眾生，早斷諸苦，速證涅槃，住如來智。我既出於生死，覺悟一切，亦令眾生出離生死，解脫煩惱，覺悟一切。唯願十方諸佛，證知我行菩薩道，發興願海。」

爾時，世尊重說頌曰：

「願我所生處，隨業而受形，
成大丈夫身，有信諸根具。
通伎術藝能，廣解諸教意，

世事悉棄捨，諸欲皆遠離。
正語住法念，莊嚴菩提心，
敬事善知識，有情咸見重。
戒儀既具足，淨念受樂報，
常畏彼惡業，遊步於善法。
恒依十度行，故得成菩提，
乃至最後身，常與眾生樂。
珠中摩尼勝，能成利他事，
願我窮未來，利益無休息。」

佛告離垢慧菩薩摩訶薩言：「若有眾生行菩薩道，如我所說，當依修學。」
說是經已，離垢慧等，及諸大眾，天、龍、夜叉、乾闥婆、阿修羅、迦樓羅、緊那羅、
摩睺羅伽，人、非人等，聞佛所說，歡喜奉行。

《大乘止觀法門》要句

○凡禮佛之法，亦有止觀二門：

一、所言觀門禮佛者：當知十方三世一切諸佛，悉與我身同一淨心為體。但以諸佛修習淨業熏心故，得成淨果。差別顯現，遍滿十方三世。然一一佛，皆具一切種智。是正遍知海，是大慈悲海，念念之中，盡知一切眾生心心數法，盡欲救度一切眾生。一佛既爾，一切諸佛，皆悉如是。

是故行者，若供養時，若禮拜時，若讚歎時，若懺悔時，若勸請時，若隨喜時，若迴向時，若發願時。當作是念：一切諸佛悉知我供養，悉受我供養，乃至悉知我發願。

猶如生盲之人，於大眾中，行種種惠施。雖不見大眾諸人，而知諸人皆悉見己所作，受己所施。與有目者行施無異。

行者亦爾。雖不見諸佛，而知諸佛皆悉見己所作，受我懺悔，受我供養。如此解時，即是現前供養。與實見諸佛供養者，等無有異也！何以故？以觀見佛心

故。佛心者，大慈悲是也！

又若能想作一佛，身相嚴好，乃至能得想作無量諸佛。一一佛前，皆見己身供養禮拜者，亦是現前供養。何以故？以是心作佛，是心是佛故。

問曰：前之一番供養，實有道理，可與現前供養無異。此後一番想作佛身者，則無道理。何以故？以實不見佛身，假想作見，即是妄想相故。

答曰：佛在世時，所有眾生現前所見佛者，亦是眾生自心作也。是故經言：「心造諸如來。」以是義故，即時心想作佛，則與彼現前見佛，一也！

又復乃勝二乘現見佛者，何以故？以彼二乘所見之佛，實從心作。由無明故，妄想曲見。謂從外來，非是心作，故即是顛倒，不稱心性緣起之義。是故經言：「聲聞曲見。」又復經言：「是人行邪道，不能見如來。」所言如來者，即是真如淨心，依熏緣起，果報顯現，故名如來。彼謂心外異來，故言不能見也！我今所見諸佛，雖是想心所作，但即能知，由我想念熏真心故，心中現此諸佛。是故所見之佛，不在心外，唯是真心之相。有即非有，非有即有。不壞真寂，不壞緣起。是故勝彼二乘現前見也。

又若我以想心熏真心故，真心性起，顯現諸佛，而言是妄想者。道場會眾，皆以見佛之業，熏真心故，盧舍那佛在於真心中現，彼諸菩薩，亦是妄想。若彼菩薩所見之佛，實從心起，見時即知不從外來，非是妄想者。我今所見諸佛，亦從心起，亦知不從外來，何為言是妄想？又復彼諸菩薩，所修見佛之業，悉是心作，還熏於心。我今念佛之想，亦是心作，還熏於心。彼此即齊。是故彼若非妄想，我即真實。

問曰：若一切諸佛，唯由眾生自心所作者，即無有實佛出世。

答曰：不妨一切諸佛出世，而即是眾生自心所作。何以故？謂由一切諸佛，一切眾生，同一淨心為體故。然此淨心，全體唯作一眾生，而即不妨全體復作一切凡聖。如一眾生，是淨心全體所作，其餘一一凡聖，悉皆如是。一時一體，不相妨礙。是故若偏據一人，以論心者，此人之體，即能作一切凡聖。如藏體一異中，釋此義也！由此義故，一切諸佛，唯是我心所作。但由共相不共相識義故，雖是我心能作諸佛，而有見不見之理。如共相不共相識中具明。

以是義故，若能方便假想者。此想即熏真心，與諸佛悲智之熏相應故。於真

心中顯現諸佛，自得見之。此所現之佛，以我假想見佛之業，與佛利他之業相應，熏心起故，此佛即是我共相識也。是共相識故，即是真實出世之佛，為我所見。若無見佛之業，與佛利他之德，相應熏心者，一切諸佛雖是我淨心所作，而我常不得見佛。

是故若偏據諸佛以論淨心。即諸佛淨心，作一切眾生；但佛有慈悲智力熏心，故得見一切眾生。若偏據眾生以論淨心，即眾生淨心，作一切諸佛；但眾生有見佛之業熏心，故得見一切諸佛。

是故假想熏心者，即心中諸佛顯現可見。所見之佛，則是真實出世之佛。若不解此義，故謂釋迦如來，是心外實佛。心想作者，是妄想作佛。如是執者，雖見釋迦如來，亦不識也！

又復行者，既如是知一切諸佛，是心所作故。當知身及供具，亦從定心出生。以是義故，當想自身心，猶如香藏王。身諸毛孔內，流出香煙雲，其雲難思議，充滿十方刹。各於諸佛前，成大香樓閣，其香樓閣內，無量香天子，手執殊妙香，供養諸最勝。或復想自身，遍滿十方國，身數等諸佛，親侍於如來。彼諸一

一身，猶如大梵王，色相最殊妙，五體禮尊足。知身及供具，悉是一心為，不生妄想執，謂為心外有。復知諸菩薩，所有諸供具，悉施諸眾生，令供養諸佛。是故彼供具，即是我已有，知是已有故，持供諸如來。以己心作物，及施他己者。復迴施眾生，供獻諸最勝，深入緣起觀，乃能為此事。此觀門禮佛。

二、止門禮佛者：當知一切諸佛，及以己身，一切供具，皆從心作，有即非有，唯是一心。亦不得取於一心之相，何以故？以心外無法能取此心相故，若有能取所取者，即是虛妄，自體非有。如是禮者，即名止門。

復不得以此止行故，便廢息觀行，應當止觀雙行。所謂雖知佛身我身，及諸供具，體唯一心，而即從心出生緣起之用，熾然供養。雖復熾然供養，而復即知有即非有，唯是一心，平等無念。是故經言：「供養於十方，無量億如來，諸佛及己身，無有分別相。此是止觀雙行也。」

佛三身讚(西土賢聖撰)

西天譯經三藏朝散大夫試光祿卿明教大師法賢奉 詔譯

法身

我今稽首法身佛	無喻難思普遍智
充滿法界無罣礙	湛然寂靜無等等
非有非無性真實	亦非多少離數量
平等無相若虛空	福利自他亦如是

報身

我今稽首報身佛	湛然安住大牟尼
哀愍化度菩薩眾	處會如日而普照
三祇積集諸功德	始能圓滿寂靜道
以大音聲談妙法	普令獲得平等果

化身

我今稽首化身佛	菩提樹下成正覺
或起變現或寂靜	或復往化於十方
或轉法輪於鹿苑	或現大光如火聚
三塗苦報悉能除	三界無比大牟尼

迴向

如是佛身無漏智	我常信解淨三業
以無量慧大福行	一心垂愍諸群生
以今頌讚三身佛	所獲無漏功德種
願我速證佛菩提	盡引眾生歸正道

稱讚如來(一)

一、讚十方佛寶：稽首皈依十方佛 悲智雙運無上士

自利利他悉圓滿 令得涅槃恒安隱

二、讚十方法寶：稽首皈依十方法 諦理圓明潤群生

能除熱惱蠲眾病 行者速至無為岸

三、讚十方僧寶：稽首皈依十方僧 隨佛依教弘真範

統理大眾皆無礙 咸令出離證菩提

四、讚釋迦如來

天上天下無如佛 十方世界亦無比

世間所有我盡見 一切無有如佛者

南無娑婆世界 三界導師 四生慈父 人天教主

三類化身 本師釋迦牟尼佛

五、讚藥師如來

藥師如來琉璃光 誓願宏深世莫量

顯令生善集福慶 密使滅惡消禍殃

拔苦必期二死盡 與樂直教萬德彰

法界聖凡同歸命 蒙恩速得證真常

南無東方淨琉璃世界 藥師琉璃光如來

六、讚彌陀如來

阿彌陀佛身金色 相好光明無等倫

白毫宛轉五須彌 紺目澄清四大海

光中化佛無數億 化菩薩眾亦無邊

四十八願度眾生 九品咸令登彼岸

南無西方極樂世界 大慈大悲 阿彌陀佛

稱讚如來(二)

一、讚文殊菩薩：文殊菩薩德難量 久成龍種上法王

因憐眾生迷自性 特輔釋迦振玄綱

為七佛師體莫測 作菩薩母用無方

常住寂光應眾感 萬川一月影咸彰

南無清涼山金色世界 大智文殊師利菩薩

二、讚普賢菩薩：菩薩慈悲不可陳 聖凡悉使證圓因

一心不住超諸位 十願導歸繼能仁

三乘咸令契果覺 群萌速得脫煩塵

恪遵大士清明誨 決定即生達本真

南無峨嵋山銀色世界 大行普賢王菩薩

三、讚觀音菩薩：觀音誓願妙難思 清淨莊嚴累劫修

三十二應徧塵刹 百千萬劫化閻浮

瓶中甘露常時灑 手內楊柳不計秋

千處祈求千處現 苦海常作渡人舟

南無普陀山琉璃世界 大慈大悲 觀世音菩薩

四、讚勢至菩薩：勢至菩薩德無疆 輔弼彌陀作慈航

救苦直同觀自在 導西不異普賢王

修因徧用根塵識 證果俱獲圓通常

攝念佛人歸淨土 此恩永劫莫能忘

南無西方極樂世界 無邊光熾身 大勢至菩薩

五、讚地藏菩薩：大士誓願不可測 運悲周徧塵刹國

眾生盡後誓方休 地獄空時願始息

受化多成無上道 自身猶示聲聞迹

祇緣生佛性唯一 欲令同獲究竟即

南無九華山幽冥世界 大慈大悲 十輪拔苦 本尊地藏王菩薩

供養三寶(一)

○若有善男子善女人，遇佛形像、菩薩形像、辟支佛形像、轉輪王形像，布施供養，得無量福，常在人天受勝妙樂。若能迴向法界，是人福利不可為喻。《地藏經》

○若有善男子善女人，遇大乘經典，或聽聞一偈一句，發殷重心，讚歎恭敬，布施供養，是人獲大果報，無量無邊。若能回向法界，其福不可為喻。《地藏經》

○若有善男子女人，修毛髮善事，乃至懸一旛一蓋，少香少華，供養佛像及菩薩像。或轉讀尊經，燒香供養一句一偈。我等鬼王敬禮是人，如過去現在未來諸佛。《地藏經》

○若四部衆，將持七寶滿世界中，布施十方一切諸佛，不如一錢一華一香，好心布施阿彌陀佛者。

《陀羅尼集經》

○善男子！此觀世音菩薩不可思議威神之力，已於過去無量劫中，已作佛竟，號正法明如來。一切人天常須供養，專稱名號，得無量福，滅無量罪。命終往生阿彌陀佛國。《大悲心陀羅尼經》

○若未來世，有善男子善女人，欲求現在未來百千萬億等願、百千萬億等事。但當歸依瞻禮，供養讚歎，地藏菩薩形像，如是所願所求，悉皆成就。《地藏經》

○諸菩薩等積集種種福德善根，應供養佛，供養法，供養僧，孝養父母，常不斷絕。

《大方廣佛華嚴經不思議佛境界分》

○供養佛者，得大福德，速成阿耨多羅三藐三菩提，令諸衆生皆獲安樂。

供養法者，增長智慧，證法自在，能正了知諸法實性。

供養僧者，增長無量福智資糧，致成佛道。《大方廣佛如來不思議境界經》

○父母衆僧，宜應讚歎軟語，常念其恩。衆僧者，出三界之福田。父母者，三界內最勝福田。

《大方便報恩經》

供養三寶(二)

供養佛——若人能以四天下寶，供養如來，有人直以種種功德，尊重讚歎，至心恭敬，是二福德等無差別。

所謂「如來身心具足。身有微妙三十二相、八十種好、具足大力。心有十力、四無所畏、大悲三念、五智三昧、三種法門、十一種空觀、十二緣智、無量禪定、具足七智，已能度到六波羅蜜岸。」若人能以如是等法，讚歎佛者，是人則名真供養佛。《優婆塞戒經》

供養法——若能供養十二部經，名供養法。云何供養十二部經？

若能至心信樂受持，讀誦解說，如說而行。既自為己，復勸人行，是名供養十二部經。

《優婆塞戒經》

供養僧——若有供養發菩提心受持戒者出家之人、向須陀洹至阿羅漢果，名供養僧。《優婆塞戒經》

福無別——善男子！若能如是至心供養佛法僧者，若我現在及涅槃後，等無差別。

我若在世及涅槃後，所設供養，施者受福，等無差別。

是故智者應當至心、勤心，供養生身、滅身、形像、塔廟。《優婆塞戒經》

法供養——善男子！諸供養中，法供養最。所謂如說修行供養、利益眾生供養、攝受眾生供養、代

眾生苦供養、勤修善根供養、不捨菩薩業供養、不離菩提心供養。《華嚴經》

供養香花燈及齋食之功德

截錄《分別善惡報應經》

○塗香供養如來之塔

獲十功德

- 一、鼻根清淨
- 二、身離臭穢
- 三、身妙香潔
- 四、形相端嚴
- 五、世間恭敬
- 六、樂法多聞
- 七、尊貴自在
- 八、聲譽遐布
- 九、命終生天
- 十、速證圓寂

○於如來塔施花供養

功德有十

- 一、色相如花
- 二、世間無比
- 三、鼻根不壞
- 四、身離臭穢
- 五、妙香清淨
- 六、往生十方淨土見佛
- 七、戒香芬馥
- 八、世間愍重得大法樂
- 九、生天自在
- 十、速證圓寂

○施燈供養佛舍利塔

獲十功德

- 一、肉眼清淨
- 二、獲淨天眼
- 三、離於三毒
- 四、得諸善法
- 五、聰明智慧
- 六、遠離愚癡
- 七、不墮黑闇三塗
- 八、尊貴自在
- 九、往生諸天
- 十、速證圓寂

○齋食供養佛及眾僧

功德有十

- 一、壽命延長
- 二、形色圓滿
- 三、肢節多力
- 四、記憶不忘
- 五、智慧辯才
- 六、眾睹歡喜
- 七、豐足珍寶
- 八、人天自在
- 九、命終生天
- 十、速證圓寂

○凡食時亦有止觀兩門《大乘止觀法門》

所言觀者：初得食時，為供養佛故，即當念於此食，是我心作，我今應當變此疏食之相，以為上味。何以故？以知諸法本從心生，還從心轉故。作是念已，即想所持之器，以為七寶之鉢。其中飲食，想為天上上味。或作甘露，或為粳糧，或作石蜜，或為酥酪，種種勝膳等。作此想已，然後持此所想之食，施與一切眾生，共供養三寶四生等食之。當念一切諸佛及賢聖，悉知我等作此供養，悉受我等如是供養。作此供養已，然後食之。是故經言：「以一食施一切，供養諸佛及諸賢聖，然後可食。」

問曰：既施與三寶竟，何為得自食？

答曰：當施一切眾生，共供養三寶時，即兼共施眾生食之。我此身中八萬戶蟲，即是眾生之數故。是故得自食之，令蟲安樂，不自為己。

又復想一鉢之食，一一米粒，復成一鉢上味飲食。於彼一切鉢中，一一粒米，復成一鉢上味飲食。如是展轉出生，滿十方世界，悉是寶鉢，成滿上味飲食。作此想已，持此所想之食，施與一切眾生，令供養三寶四生等。作此想已，然後自食，令己身中諸蟲飽滿。

開顯方便藏(一)

截錄《大寶積經卷第百六》

○菩薩摩訶薩行於方便，若見十方世界中，無主花樹，及種種香，合集願以供養諸佛。若見十方世界中，有主花香，若香若葉，風所吹者，一切合集，願以供養十方諸佛。以是善根，若自為，若為一切衆生，具一切智心。以是善根因緣故，得無量戒定慧解脫解脫知見，是名菩薩摩訶薩行於方便。

○菩薩摩訶薩行於方便，若禮一佛，恭敬供養尊重讚歎。作是念：「一切如來，同一法界一法身，一戒一定一慧一解脫一解脫知見。」作是念已，當知若禮一佛，恭敬供養尊重讚歎，即是禮拜供養恭敬尊重讚歎一切諸佛。若供養一佛，即是供養十方諸佛。如是供養十方佛已，是名菩薩摩訶薩行於方便。

○行方便菩薩以一搏食施與，下至畜生，願求一切智，以是菩薩與一切衆生共之，迴向阿耨多羅三藐三菩提。以是二因緣，攝取一切衆生。所謂求一切智心及願方便。

開顯方便藏(二)

截錄《大寶積經卷第一百六》

○菩薩摩訶薩行於方便，若見行施之人，生隨喜心，以此隨喜善根，願與一切衆生共之，迴向阿耨多羅三藐三菩提，是方便菩薩，亦願施者受者，不離一切智心。假令受者是二乘人，亦願不離一切智心，是名菩薩摩訶薩行於方便。

○菩薩摩訶薩行於方便，若見十方世界衆生，受諸樂報，見已作如是念，願一切衆生得一切智樂。若見十方世界衆生，受諸苦報，為諸衆生懺悔諸罪，作是大莊嚴，如是衆生所受苦惱，我悉代受，令彼得樂，以是善根，願成一切智，除一切衆生苦惱。以是因緣故，畢竟不受一切諸苦，純受諸樂，是名菩薩摩訶薩行於方便。

○應作是念：「如佛所說，心增廣大，勝以財施。」我財施雖少，以一切智心，願是善根，成一切智，令諸衆生悉得寶手，猶如如來。以是緣故，具足施戒禪定福處，是名菩薩摩訶薩行於方便。

○菩薩摩訶薩行於方便，以方便力故，雖行少施，所得福德無量無邊阿僧祇。

供養妙香法

我弟子○○仰仗普賢行願威神之力，願此妙香雲，一爲無量，遍滿十方世界一切如來道場海中，普徧代替十方法界六道群靈，一切天、人、阿修羅、地獄、餓鬼、畜生，以及代替弟子○○歷劫以來，乃至今生的父母、師長、知識、檀越、法俗眷屬、冤親債主，一心供養十方世界一切諸佛、一切尊法、一切賢聖僧，供養現前及十方世界的○○○佛、○○○菩薩，供養護法龍天，普熏眾生，同增福慧，同生西方，同成佛道。

○供香觀想法

善男子！我欲供養然此香時，從一一香出無量香，遍滿十方一切法界，一切如來道場海中，化爲種種香宮殿、香垣牆、香樓閣、香欄楯、香卻敵、香門戶、香窗牖、香半月、香羅網、香形像、香圓光、香嚴具、香光明、香雲雨、香幢、香帳、香幡、香蓋，莊嚴十方一切法界，處處充滿以爲供養。

——《四十華嚴·卷十一》——

○供香功德回向

願一切眾生具足戒香，得不缺戒、不雜戒、不汙戒、無悔戒、離纏戒、無熱戒、無犯戒、無邊戒、出世戒、菩薩波羅蜜戒、願一切眾生以是戒故，皆得成就諸佛戒身。

——《八十華嚴·卷二五》——

供養香華法

我弟子○○仰仗普賢行願威神之力，願此香華，一爲無量，遍滿十方世界一切如來道場海中，普徧代替十方法界六道群靈，一切天、人、阿修羅、地獄、餓鬼、畜生，以及代替弟子○○歷劫以來，乃至今生的父母、師長、知識、檀越、法俗眷屬、冤親債主，一心供養十方世界一切諸佛、一切尊法、一切賢聖僧，供養現前及十方世界的○○○佛、○○○菩薩，供養護法龍天，普熏眾生，同增福慧，同生西方，同成佛道。

○布施華時功德迴向：

願一切眾生皆得諸佛三昧之華，悉能開敷一切諸法；

願一切眾生皆得如佛，見者歡喜心無厭足；

願一切眾生所見順懷，心無動亂；

願一切眾生具行廣大清淨之業；

願一切眾生常念善友，心無變異；

願一切眾生如阿伽陀藥，能除一切煩惱眾毒

願一切眾生成滿大願，皆悉得爲無上智王；

願一切眾生智慧日光破愚癡暗；

願一切生菩提淨月增長滿足；

願一切眾生入大寶洲，見知識具足成就一切善根。

供養淨水果汁法 · 供養水果法

我弟子○○仰仗普賢行願威神之力，願此淨水果汁，一爲無量，

遍滿十方世界一切如來道場海中，普徧代替十方法界六道群靈，一切天、人、阿修羅、地獄、餓鬼、畜生，以及代替弟子○○歷劫以來，乃至今生的父母、師長、知識、檀越、法俗眷屬、冤親債主，一心供養十方世界一切諸佛、一切尊法、一切賢聖僧，供養現前及十方世界的○○佛、○○菩薩，供養護法龍天，供養法界一切眾生，都能同增福慧，同生西方，同成佛道。

○布施飲時功德回向：

願一切眾生飲法味水，精勤修習，具菩薩道，斷世渴愛，常求佛智，離欲境界，得法喜樂，從清淨法而生其身，常以三昧調攝其心，入智慧海，興大法雲，霑大法雨。

——《八十華嚴·卷二五》——

我弟子○○仰仗普賢行願威神之力，願此水果，一爲無量，遍滿十方世界一切如來道場海中，普徧代替十方法界六道群靈，一切天、人、阿修羅、地獄、餓鬼、畜生，以及代替弟子○○歷劫以來，乃至今生的父母、師長、知識、檀越、法俗眷屬、冤親債主，一心供養十方世界一切諸佛、一切尊法、一切賢聖僧，供養現前及十方世界的○○佛、○○菩薩，供養護法龍天，供養法界一切眾生，都能同增福慧，同生西方，同成佛道。

○布施食時功德迴向：

願一切眾生得智慧食，心無障礙，了知食性無所貪著，但樂法喜出離之食，智慧充滿，以法堅住，攝取善根，法身智身清淨遊行，哀愍眾生，爲作福田，現受搏食。

供養油燈法

我弟子○○仰仗普賢行願威神之力，願此油燈，一爲無量，遍滿十方世界一切如來道場海中，普徧代替十方法界六道群靈，一切天、人、阿修羅、地獄、餓鬼、畜生，以及代替弟子○○歷劫以來，乃至今生的父母、師長、知識、檀越、法俗眷屬、冤親債主，一心供養十方世界一切諸佛、一切尊法、一切賢聖僧，供養現前及十方世界的○○佛、○○菩薩，供養護法龍天，普熏眾生，普照眾生，同增福慧，同生西方，同成佛道。

○供養燈明功德回向

願一切眾生得無量光，普照一切諸佛正法；
願一切眾生得清淨光，照見世間極微細色；
願一切眾生得離翳光，了眾生界空無所有；
願一切眾生得無邊光，身出妙光普照一切；
願一切眾生得普照光，於諸佛法心無退轉；
願一切眾生得佛淨光，一切剎中悉皆顯現；
願一切眾生得無礙光，一光照徧一切法界；
願一切眾生得無斷光，照諸佛剎光明不斷；
願一切眾生得智幢光，普照世間；
願一切眾生得無量色光，照一切剎示現神力。

供養齋食法

我弟子○○仰仗普賢行願威神之力，願此齋食，一爲無量，遍滿十方世界一切如來道場海中，普徧代替十方世界六道群靈，一切天、人、阿修羅、地獄、餓鬼、畜生，以及代替弟子○○歷劫以來，乃至今生的父母、師長、知識、檀越、法俗眷屬、冤親債主，一心供養十方世界一切諸佛、一切尊法、一切賢聖僧，供養現前及十方世界的○○佛、○○菩薩，供養護法龍天，供養法界一切眾生，都能同增福慧，同生西方，同成佛道。

○布施種種清淨上味時功德回向：

願一切眾生得最上味，甘露充滿；

願一切眾生得法智味，了知一切諸味業用；

願一切眾生得無量法味，了達法界，安住實際大法城中；

願一切眾生作大法雲周徧法界，普雨法雨教化調伏一切眾生；

願一切眾生得勝智味，無上法喜充滿身心；

願一切眾生得無貪著一切上味，不染世間一切諸味，

常勤修習一切佛法；

願一切眾生得一法味；了諸佛法悉無差別；

願一切眾生得最勝味，乘一切智終無退轉；

願一切眾生得入諸佛無異法味，悉能分別一切諸根；

願一切眾生法味增益，常得滿足無礙佛法。

供養醫藥法

我弟子○○仰仗普賢行願威神之力，願此醫藥，一爲無量，遍滿十方世界一切如來道場海中，普徧代替十方法界六道群靈，一切天、人、阿修羅、地獄、餓鬼、畜生，以及代替弟子○○歷劫以來，乃至今生的父母、師長、知識、檀越、法俗眷屬、冤親債主，一心供養十方世界一切諸佛、一切尊法、一切賢聖僧，供養現前及十方世界的○○○佛、○○○菩薩，供養護法龍天，供養法界一切眾生，都能同增福慧，同生西方，同成佛道。

○布施湯藥時功德回向：

願一切眾生於諸蓋纏，究竟得出；
願一切眾生永離病身，得如來身；
願一切眾生作大良藥，滅除一切不善之病；
願一切眾生成阿伽陀藥，安住菩薩不退轉地；
願一切眾生成如來藥，能拔一切煩惱毒箭；
願一切眾生親近賢聖，滅除煩惱，修清淨行；
願一切眾生作大藥王，永除眾病不令重發；
願一切眾生作不壞藥樹，悉能救療一切眾生；
願一切眾生得一切智光，出眾病箭；
願一切眾生善解世間方藥之法，所有疾病爲其救療。

懺悔業障(一)

○十種順生死心：

- 一、妄計人我，起於身見
- 二、內具煩惱，外遇惡緣，我心增盛
- 三、內外既具，滅善心事，不喜他善
- 四、縱恣三業，無惡不為
- 五、事雖不廣，惡心徧布
- 六、惡心相續，晝夜不斷
- 七、覆諱過失，不欲人知
- 八、虜扈抵突，不畏惡道
- 九、無慚無愧，不懼凡聖
- 十、撥無因果，作一闡提

○十種逆生死心：

- 一、明信因果
- 二、自愧剋責
- 三、怖畏惡道
- 四、不覆瑕疵
- 五、斷相續心
- 六、發菩提心
- 七、修功補過
- 八、守護正法
- 九、念十方佛
- 十、觀罪性空

懺悔業障(二)

○師子吼言：世尊！何等人能轉地獄報，現世輕受？

佛言：善男子！若有修習身戒心慧，如先所說。能觀諸法，同如虛空。不見智慧，不見智者。不見愚癡，不見愚者。不見修習，及修習者，是名智者。如是之人，則能修習身戒心慧。是人能令地獄果報，現世輕受。

是人設作極重惡業，思惟觀察，能令輕微。

作是念言：「我業雖重，不如善業。」

常思惟言：「我善力多，惡業羸弱。我能發露懺悔除惡，能修智慧。智慧力多，無明力少。」

如是念已，親近善友，修習正見，受持讀誦書寫解說十二部經。見有受持讀誦書寫解說之者，心生恭敬，兼以衣食房舍臥具病藥華香而供養之，讚歎尊重。所至到處，稱說其善，不說其短。供養三寶，敬信方等大涅槃經。如來常恆，無有變易。一切眾生，悉有佛性。是人能令地獄重報，現世輕受。

善男子！以是義故，非一切業悉有定果，亦非一切眾生定受。

懺悔業障(三)

○有四業障，難可滅除。云何為四？

一者於菩薩律儀，犯極重惡。

二者於大乘經，心生誹謗。

三者於自善根，不能增長。

四者貪著三有，無出離心。

○若人成就四法，能除業障，永得清淨。云何為四？

一者不起邪心，正念成就。

二者於甚深理，不生誹謗。

三者於初行菩薩，起一切智心。

四者於諸眾生，起慈無量。

○復有四種對治業障。云何為四？

一者於十方世界一切如來，至心親近，說一切罪。

二者為一切眾生，勸請諸佛，說深妙法。

三者隨喜一切眾生所有功德。

四者所有一切功德善根，悉皆迴向阿耨多羅三藐三菩提。